

Kako izgraditi prvi portfolio?

Strateški koraci od definisanja ciljeva i tolerancije na rizik do alokacije kapitala i dugoročne discipline.

Ako ste odlučili da počnete investirati, ne morate odmah znati koje akcije, obveznice ili druge finansijske instrumente želite kupiti. Prije izbora konkretnih investicija, važno je razmisliti šta želite postići ulaganjem i koji nivo rizika ste spremni da preuzmete.

Za početak, postavite sebi nekoliko pitanja:

1. Vremenski rok

Na koji rok planirate da investirate?

2. Očekivani prinos

Kakav prinos očekujete?

3. Podnošenje gubitka

Koliki pad vrijednosti biste mogli podnijeti bez promjene svog investicionog plana?

Odgovori na ova pitanja pomoći će vam da odredite kako rasporediti kapital između različitih vrsta imovine i kakvu strukturu portfolija izabrati.

Počnite od cilja, ne od investicije

Postoji razlika između investiranja na kratak rok i izgradnje portfolija sa vremenskim horizontom od deset ili dvadeset godina. Cilj i vremenski horizont određuju koliko prostora imate za preuzimanje rizika. Kod dugoročnog ulaganja na raspolaganju vam je duži vremenski period za prolazak kroz periode pada i oporavka tržišta, tako da možete „zažmiriti“ na oscilacije cijena HOV iz vašeg portfolija. Sa druge strane, ukoliko znate da će vam novac biti potreban u kraćem roku, očuvanje kapitala i likvidnost dobijaju na značaju, jer je manje vremena za oporavak nakon eventualnog pada vrijednosti ulaganja. Zato je potrebno da prvo definišite gdje želite da stignete i koliko vremena imate na raspolaganju.

1. Definicija cilja

Rok ulaganja i likvidnost

2. Raspodjela kapitala

Alokacija po vrstama imovine

3. Izbor konkretnih HOV

Akcije, obveznice, ETF-ovi

Koliko rizika zaista možete preuzeti?

Svaka investicija nosi određeni rizik, ali neće svaki investitor isti pad vrijednosti doživjeti na isti način. Zato je korisno razmisliti koliko promjene vrijednosti portfolija možete prihvatiti, a da zbog njih ne odustanete od svog investicionog plana.

Primjer za razmišljanje o riziku:

Zamislite da ste uložili **20.000 KM** i da, nakon pada tržišta, vaš portfolio vrijedi **16.000 KM**. Da li biste takvu promjenu mogli prihvatiti i nastaviti da investirate prema planu ili biste poželjeli da prodate HOV u cilju sprečavanja daljeg gubitka? Ako znate da bi vas veće oscilacije navele na odluke sa kojima se inače ne biste osjećali ugodno, vjerovatno nema smisla graditi portfolio koji je izrazito rizičan samo zbog mogućnosti većeg prinosa.

Prvo rasporedite kapital, a onda birajte konkretne HOV

Kada znate cilj, period ulaganja i nivo rizika koji vam odgovara, dolazi jedna od najvažnijih odluka – alokacija sredstava. Najjednostavnije rečeno, potrebno je odlučiti koliki dio portfolija želite imati u akcijama, obveznicama, novčanim sredstvima ili drugim vrstama imovine. Ova odluka će u značajnoj mjeri odrediti očekivani rizik i prinos. Tek nakon toga dolazi pitanje koje konkretne akcije, obveznice, ETF-ove ili druge instrumente izabrati.

Ključ kvalitetne diverzifikacije

Činjenica da ste investirali u veći broj hartija od vrijednosti ne znači nužno da je vaš portfolio dobro diverzifikovan. Ako, na primjer, posjedujete akcije deset tehnoloških kompanija sa istog tržišta, njihova vrijednost može zavisiti od sličnih faktora. Drugim riječima, vrlo je važno voditi računa o međusobnom odnosu hartija od vrijednosti unutar portfolija.

Portfolio nije potrebno mijenjati svaki put kada se tržište pomjeri

Kada jednom postavite portfolio, tržište će vam redovno davati razloge da poželite nešto promijeniti. Jednog dana cijene snažno rastu, drugog padaju, a gotovo svakodnevno pojavljuje se nova prilika. To ne znači da portfolio treba ostaviti bez nadzora. Naprotiv, korisno ga je povremeno pregledati i provjeriti da li njegova struktura i dalje odgovara vašim ciljevima. Sa druge strane, pad ili rast cijena sam po sebi nije razlog za trenutnu promjenu strategije. Mnogo važnije pitanje je da li se promijenilo nešto kod vas: cilj ulaganja, vremenski horizont, finansijska situacija ili nivo rizika koji možete preuzeti.

Za kraj

Prvi portfolio ne mora imati mnogo pozicija niti komplikovanu strukturu. Treba, prije svega, da ima smisla za osobu koja ga posjeduje. I ne morate sve „pogoditi“ iz prvog pokušaja. Portfolio nije nešto što se jednom formira i više nikada ne mijenja. Kako se budu mijenjali vaši prihodi, ciljevi ili životne okolnosti, mijenjaće se i način na koji želite da investirate.

Želite da definišete svoj investicioni profil i strukturu portfolija?

Razgovarajte sa našim investicionim savjetnikom i izgradite portfolio prilagođen vašim ciljevima.

→ [Investiciono savjetovanje](#)

***Pravna napomena:** Ovaj sadržaj je informativnog i edukativnog karaktera i ne predstavlja investicionu preporuku. Ulaganje u finansijske instrumente povezano je sa rizikom.*